



## Hulanda

Bo dokter òf spesialisista a disidí pa mandabu Hulanda pa saminashon òf pa bo risibí tratamentu médiko. Esaki por ta un algu hopi signifikante pa bo. Ta importante pa bo ta bon informá promé ku bo sali di biahe. Nos ta suplikábo pa tuma bon nota di kontenido di e foyeto aki. Si despues bo tin mas pregunta, gustosamente nos atendé esakinan ku bo. Den e foyeto aki nos splikabo kon bo estadia na Hulanda lo bai, ken ta embolbí den esaki i ku ken bo por tuma kontakto.

### Persona di kontakto

ZVK tin na Hulanda un kolaboradó fiho: Ellen Cornelissen. E ta esun ku ta regla kosnan manera karta di garantia pa bo tratamentunan, bo estadia i transporte na Hulanda, miéntras ku e ta bo persona di kontakto ora bo ta na Hulanda. E ta embolbí tambe den loke ta REGARDÁ bo tratamentu. Ta importante pa bo tuma kontakto kune asina bo yega Hulanda. Bo por tuma kontakto kune tambe si bo tin pregunta tokante aspektonan relashoná ku bo tratamentu médiko.

### Bo biahe

Bo ta biaha den “Economyclass” pa Hulanda. Bo por chek in tambe via internèt. Riba bo pasashi bo por tuma nota na ki momento bo mester presentá na aeropuerto. E buelo tin un durashon di mas o ménos 10 ora saliendo for di Boneiru of Sint Maarten, esaki dependiendo si bo mester hasi transferensia di aeropuerto. Kuminda bordo di avion ta inkluí den bo pasashi. Bo ta yega Hulanda un dia despues di bo salida.

### Kiko bo mester biaha kune?

Tene kuenta ku Hulanda tin un otro klima ku riba nos islanan. Dependé di e temporada di aña, e diferensia den temperatura por ta grandi. P’esei, bai ku paña adekuá pa lugánan ku ta hasi friu òf tin hopi áwaseru.

### Yegada na Hulanda

Schiphol ta un aeropuerto hopi grandi, ku distansianan largu. Paga tinu riba e bòrchinan ku ta indikábo unda bo mester kue maleta. Si bo ta den nesidat di un ròl-stul, lo pone unu kla p’abo na momento ku bo bandoná avion. Un taksista ta wardabo dilanti di e restaurant “Starbucks”, ku ta keda na bo man drechi na sala di yegada number 4. Bo ta rekonosé e taksista na un bòrchi ku bo nomber skirbi ariba ku e tin den su man. E taksista lo vigilé bo ora di yegada. Tuma kontakto telefóniko ku e taksista den kaso ku e no tei presente na Starbucks. Den e foyeto aki bo ta numberta di telefon di e kompania di taksi. E taksista lo hibabo na e lugá unda bo ta hospeda. ZVK ta regla otro forma di transporte den kaso ku bo ta bai hospeda serka famia òf amistad òf, na un otro lugá ku no ta esun unda bo ta bai risibí tratamentu.

### Notifiká e kolaboradó di ZVK na Hulanda

Ta bon pa denter di 24 ora ku bo a yega Hulanda bo tuma kontakto ku e kolaboradó di ZVK aya. Indiká na e kolaboradó na ki adrès di e-mail i number di telefon bo ta alkansabel. Den e foyeto aki bo ta haña maneranan pa drenta den kontakto ku e kolaboradó.

### Transporte

ZVK ta kubri gastunan di i ta regla transporte pa i for di e lugánan unda bo tin sita pa konsulta òf tratamentu médiko. Ta p’esei ta importante pa bo indiká na ki momento bo tin konsulta òf tratamentu. Bo por hasi esaki sea via e-mail òf via telefon na e kolaboradó di ZVK na Hulanda.

### Estadia

Si bo tin ku risibí tratamentu na Amsterdam, lo bo hospedá na e asina yamá ‘gastenverblijf’ di e sentro médiko VUmc. Riba nan wèpsait <https://www.vumc.nl/afdelingen/gastenverblijf/> bo ta haña tur informashon tokante e residensia aki. ZVK lo regla alohamentu den un hotèl pa bo, den kaso ku bo estadia ta den un otro munisipio. Si akaso bo no kier hasi uso di un hotèl, tantu abo komo e persona ku ta kompañábo lo risibí un kompensashon di estadia (verblijfsvergoeding).

Ku e kompensashon aki bo por regla bo propio estadia, por ehèmpel serka famia. Tantu den e 'gastenverblijf' di VUmc komo den hotèl, abo i e persona ku ta kompañábo lo keda den mesun kamber. Indiká den e kaso aki na ZVK si bo ta deseá un kama separá.

#### Kompensashon diario (daggeldvergoeding)

Promé ku bo biaha, ZVK lo depositá e kompensashon diario (daggeldvergoeding) pa e promé siman di estadia di abo i bo eventual kompañó riba bo kuenta di banko. Bo ta risibí kompensashon diario pa e dianan ku bo no ta interná den un hospital òf klínika. Bo ta risibí kompensashon diario tambe pa e dia ku bo a wòrdu interná i e dia ku bo a sali. E persona ku ta kompañábo ta risibí kompensashon diario pa tur e dianan di bo estadia den eksterior pa tratamentu médiko. Si bo estadia den eksterior pa tratamentu médiko ta dura mas ku un siman, lo depositá e kompensashon diario semanalmente riba bo kuenta di banko ku ZVK ta disponé di dje. Si resultá ku bo a risibí un di mas na kompensashon diario, lo deskontá esaki for di e próksimo depósito. Paga tinu: sòru pa bo karchi di bankomátiko tin kobertura mundial, di manera ku bo por lanta plaka ora bo ta na Hulanda! Lo bo tin ku paga gastunan di transakshon kada biaha ku bo lanta plaka ku bankomátiko na Hulanda. E suma ku bo tin ku paga ta varia di banko pa banko. Ta p'esei nos ta konsehábo pa usa bo karchi di bankomátiko pa paga den tienda i no lanta sumanan chikí kada biaha na un bankomátiko.

#### Durashon di bo estadia pa tratamentu médiko:

E dokter ku ta dunabo tratamentu na Hulanda ta determiná, den konsulta ku e dokter òf spesialisista ku a mandábo Hulanda, kon largu bo tratamentu médiko ta dura. Bo dokter òf spesialisista por disidí pa interumpí bo estadia den kaso ku pa un periodo largu no tin sita pa tratamentu òf saminashon.

Kontakto:

#### ZVK Bonaire

Kaya Grandi 91

Tel: +599 715 8899  
0800 1888 (gratis!)

#### ZVK Hulanda

Tel: +31 6 3074 8977

ellen.cornelissen@zorgverzekeringskantoor.nl

#### Kompanianan di Taksi

Estadia na Amsterdam: Taxi Marjot: Tel 06-45666329

Estadia na Rotterdam: Taxi Tielman: Tel: 06-23030990

#### Gastenverblijf VUmc

+31 20 444 0555

gastenverblijf.info@vumc.nl